



NATIONAL AIDS COMMISSION

Powered to Conquer HIV and AIDS

PUO EA KAMOHELO KA SETHO BOTO [BOARD OF COMMISSIONERS] EA NAC, ADVOCATE LEHLANAKO MOFILIKOANE-LEQELE 'MOKENG OA SELEKANE LITABENG TSA HIV LE AIDS, O TŠOARETSEOENG 'MANTHABISENG CONVENTION CENTRE KA LA 14 PHEREKHONG 2010

**MOTLOTLEHI HLOOHO EA NAHA;
MOHLOMPHEHI TONA-KHOLO;
MOHLOMPHEHI LETONA LE KHABANE OFISING EA TONA-KHOLO;
BAHLOMPHEHI BAEMELI BA LINAHA LE MEKHATLO EA MACHABA BA TENG KOANO;
BAHLOMPHEHI BABUSI BA LITEREKE;
BANGOLI BA MAKHOTLA A LITEREKE;
BAHLANKA BA BAHOLO BA 'MUSO, BAEMELI BA LIKHOEBO LE MEKHATLO E IKEMETSENG BA TENG KOANO;**

LITHO TSA LITSI TSA LIPHATLALATSO TSA LITABA; BO 'M'E LE BO NTATE;

Kea le amohela 'mokeng ona oa kajeno oa HIV le AIDS oa hang kamor'a khoeli tse tharo. Le ha re le maqalong a selemo sena sa 2010, 'moka ona ke oa bobeli selemong lichelete sa 2009/2010 , ka hona re ke ke ra re ke hona re ntse re iphumana hore na tema re e qala joang joalokaha ho tloaelehile ha selemo se qala. Ke mpe ke le amohele selemong sena se secha ka hore re ke re bone phetoho e ba teng ntoeng ena eo re leng ho eona ea HIV le AIDS 'me re ikitlaetseng ho feta pele. Selemong sena ha re ke re reng ho lekane ka litšoaetso tse ncha; re mpe re sebetsane feela le tse seng li le teng.

'Mokeng ona moo re kopanang hang kamor'a khoeli tse tharo, ke oa rona kaofela re le ba nkang karolo litabeng tsa HIV le AIDS. Ha se oa Lekhotla le hokahanyang litaba tsa HIV le AIDS bo 'M'e le bo Ntate. Joaloka ha e le tloaelo, re tla fumana tlaleho ea naha ka kakaretso, ho re fa leseli la hore re le naha khoeling tsena tse tharo tse fetileng, e leng Phupu ho isa ho Loetse selemong sena sa lichelete ebe re sebelitse joang. Re boele re fumane tlaleho ea tšebetso ea litereke ka kotloloho. Re ke re tsepamiseng maikutlo

a rona hore na moo likhaello li leng teng re li lokisa joang re kopane kapa ka bomong mafapheng ao re sebetsang ho ona. Ha li le tjena litlaleho tsena, ke tsa rona batho ba ka mona, ka hona ha re etseng bonnete ba hore lia nepahala 'me li bontša ka nepo se etsahetseng ka ha e le lona ba etsang mosebetsi mane sechabeng.

Ho boetse hape ho tla ba le mekhatlo e meng e ikemetseng e tla fana ka litlaleho tsa mafapha a eona e le bo 'mamekhatlo, 'me e tla tsepamisa maikutlo holim'a likatleho le liphephetso; haholo-holo lintlha tseo ba boneng li sebetsa ka katleho 'me li ka qopitsoa ke mafapha a mang. Ho bohlokoa ho ithuta le ho tseba hore re le ba nang le kobo ea bohali litabeng tsa HIV le AIDS, re ntse re etsang ka bomong, e le hore re fanane malebela, re be re theheng lilekane moo re etsang tšebetso e tšoanang. Boemo ha bo lumele hore re sebetse ka karohano.

MOTSAMAISI OA LIPUISANO

Rea tseba bohle liphephetso tseo re tobaneng le tsona tse bakiloeng ke HIV le AIDS. Ke ka kopano tsa mofuta ona rona batho ba nang le kobo ea bohali re fananang ka malebela le ho

ithuta ka tse ncha tse ntseng li etsahala toantšong ea lefu lena. Le tla hopola 'mokeng o fetileng moo re ileng ra fumana tlaleho e ileng ea re beha leseling haholo ka litaba tsa ka Quthing. Litlaleho tsa mofuta oo li susumetsa hore ba amehang ba nke mehato e nepahetseng ho tlisa litaba tlas'a taolo.

BO 'M'E LE BO NTATE,

Ha ke le mothating ona ke lakatsa ho leboha tšebelisano 'moho eo re nang le eona le lona le le balekane ba rona toantšong ea HIV le AIDS. Le etsa mosebetsi o matla ka boitelo. Ha e nne e sise, e sisetse Basotho. Re le National AIDS Commission le rona re tšepisa ho leka ka tsela tsohle ho fana ka tšehetso e hlokahalang hore le phethe mosebetsi oa lona molemong oa sechaba sa Basotho.

Ke le lakaletsa lipuisano tse mofuthu tse phuthulohileng tse tla fana ka khatelo-pele.

Kea leboha.